

AB  
13  
H12



80  
107

P. f. 110

Theologie  
E. VI. 428



3

**D**anckſagung  
Für das bitter leiden  
vnd ſterben Jeſu  
Chriſti.

Mit angehengtem bericht von  
dem Abendmal des Herrn.

Vnd wes ſich ein Chriſten vn-  
ter ſchrecklichem Wetter vnd  
harten Donnerſchlegeln  
tröſten ſol.

Geſtellet durch

*M. Stephanum Prætorium.*



Anno ſalutis 1582.  
25 Martij.

Faint, illegible text in a single column, possibly bleed-through from the reverse side of the page. The text is arranged in approximately 20 lines within a rectangular border.



# Danckſagung.

**D**u aller süße-  
ste namen / Jesu  
Christe / der du bist  
der Son / das bild /  
vnd das hercz / Got-  
tes deines lieben Himlischen Va-  
ters / mit welchem du / von ewig-  
keit her / als der rechte himlische  
Drator / von vnser schöpfung  
vnd erlösung / vnd andern hohen  
vnd wichtigen sachen geredet / vnd  
dazu die Welt geschaffen hast /  
Wir dein auserweltses Volck / an-  
stat der Jüden / die dich verworf-  
fen / sagen deiner vnaussprech-  
lichen liebe / güte vnd barmher-  
zigkeit ewig lob vnd danck / das  
du für vns armen Sünder / nicht  
A ij allein

allein ein Mensch / sondern auch  
ein Osterlemblin vñ schlachtlem-  
blin geworden bist. Deñ du zartes  
Lemblin hast für erst aller Welt  
sünde / welche ist die aller schwe-  
reste last / auff dich geladen / vnd  
hernach für dieselbe gnug gethan /  
vnd Im Delgarten ist dir schreck  
des bittern Todes ankomen / mit  
welchem du so hefftig gerungen /  
das dir auch vber solchem kampff  
blutiger schweis / ja geliefert blut /  
aus deinem leibe geflossen ist. Zu-  
das / dein lieber freund vnd Tisch-  
genosse / dem du dein hertz vnd al-  
les zugetrawet / hat dich vmb 30.  
Silberling / mit einem Kus ver-  
raten. O geitz / du aller schendlich-  
stes laster / vnd du wurzel alles  
bösen. Deine feinde / die Jüden /  
habē dich / wie eine Hinde / geiagt /  
ge-

gefangen / vnd mit vielen stricken  
gebunden / der du doch teglich mit  
inen vmbgangen / vnd öffentlich  
im Tempel geleret hast. Du bist  
des abends spet / von den Blut-  
hunden / zu dem alten Hannas ge-  
füret worden / das er seine lust an  
dir / vnd an deinem elend schawte.  
Von Hanna aber / zu dem Hohen-  
priester Caiphas. In dieses fro-  
men Mannes / vnd geistlichen Va-  
ters Pallaste / bistu verhöret / be-  
speiet / vnd mit feusten geschlagen  
worden. Denn warumb woltestu  
es mit inen nicht halten / sondern  
eine newe Lere / vnd ein new wesen  
wider sie anfahen? Welche deine  
gefahr / do S. Petrus vermerck-  
te / ist er vns zum trost sehr tieff  
gefallen / vnd hat dich zu dreyen  
malen schendlich verleugnet / da-

A iij mit

mit ja niemand in sich selbst / son-  
dern nur allein in deiner gnaden  
vermessen sey. Folgends / hat man  
dich / als einen todtwirdigen / zum  
Herrn Pontio Pilato gefüret /  
dem Römischen Landvogte / wel-  
cher damals das Scepter vber die  
Juden in seiner hand hatte / das  
er dich / auff ire falsche anklage /  
zum tode verdammete. Denn du  
heilsames liecht / warest inen nicht  
leidlich / sie wolten finsternis ha-  
ben / vnd wenn du aus dem wege  
werest / so würde es in der Welt  
recht vnd wol zu gehen. Pilatus  
hat dich wol vnschuldig befun-  
den / aber dennoch gleichwol / wie  
ein öffentlichen Vbeltheter / zum  
tode verurtheilet / vnd nach Rö-  
mischer weise / mit scharffen ruten  
hefftig streichen lassen. O ir Rich-  
ter



ter/ richtet recht/ vnd nicht wider  
gewissen/ Straffet das böse/ vnd  
schützet das fromme/ ladet ja nicht  
vnschuldig Blut auff euch / vnd  
eure kinder. Da ist dir / O du  
herzliebester Gottes Son / dein  
heiliges Blut / aus deinen stie-  
men vnd wunden / abermal ober  
deinen zarten Leib geflossen. Ma-  
ria/ sage her/ wie ist dir dazumal  
dein Mütterlich herz gestanden  
Sind dir auch deine augen ober-  
gangen / vnd dein herz blut ge-  
weinet / von grossen schmerzen  
Nach solchem jamer / sind des  
Pontij Pilati stolze Kriegersleute  
zu getreten / vnd haben dir aus  
obermut eine dörne Krone auff  
gesetzt / vnd ein roten Purpurn  
mantel umbgehengt / vñ ein rhor-  
stab in die hand gegeben / vnd die

A iiii knie

Knie für dir gebeuget / vnd dir ins  
angesicht gespeiет / vñ dein Heupt  
mit dem Rohr geschlagen / vnd  
gesagt / *Aue Rex Iudæorum*. War-  
lich / solchem Man möchte man  
noch wol ins angesicht speien / vnd  
mit feusten schlagen. Welches du  
aber alles mit grosser gedult ge-  
litten / vnd deinem himlischen Va-  
ter zu richten befohlen hast. Dar-  
auff hat man dir deine kleider  
widerumb angezogen / nemlich  
vber deinen blutrünstigen leib / vnd  
ein schweres Creutz aufgelegt /  
welches du selbst / als der frome  
Isaac / ja als ein gehorsames Lem-  
lin / bis ans Gericht hast tragen  
müssen. Simon hat dir wol ge-  
holffen / aber siebē mal bistu gleich  
wol darunter / wie man sagen  
wil / von grosser amacht / zur Er-  
den

den gefallen. Die Jüdischen We-  
ber haben dich wol beweinet / es  
were aber besser gewesen / sie het-  
ten sich selbst beweinet / vnd sich  
am vnschuldigen blute nicht ver-  
griffen. Am Gericht / hat man  
dich abermal / für so viel tau-  
sent Menschen augen / nacktet vnd  
blos aus gezogen / an ein Creutz  
gehefft / vnd zwischē zween Mör-  
dern erhaben / das dich alle Welt  
hat sehen können. Da sind dir  
deine glieder ausgerectet vñ aus-  
gedenet / das man dir alle deine  
knochen im leibe hat zelen können.  
Deine hende vnd füsse haben blut  
getröffelt / vnd dein zarter leib ist  
mit deinem heiligen Blute begos-  
sen vnd gesalbet. O wie bistu alda  
so ein armes / misstaldiges / vnd  
erbarmliches Würmlin gewesen!  
N v voller

voller schmach / schmerken / vnd  
francheiten / das man auch das  
angefichte für dir verhüllet hat.  
Da hastu gewinselt / wie eine  
Taube / vnd dich gekrümmet / wie  
eine Made / so mit füßen getreten  
wird. Wie haben deine Feinde /  
die grossen Schsen vnd Lewen /  
wider dich gebrüllet / vnd ober  
dich gefroloket? Zu derselbigen  
zeit hastu dich wol vmbgesehen  
nach hülff vnd trost / Aber da ist  
keine hülffe noch trost fürhanden  
gewesen. Deine Freunde haben  
dich alle verlassen / deine Feinde  
aber haben dir Essig vnd Gallen  
zu trincken gegeben / in deinem  
grossen durst. Hastu andern ge-  
holffen / sprachen sie / so hilff dir  
nun auch / Bistu Gottes Son / so  
steig vom Creutz. Ja endlich bistu  
in

in diese hohe schwere anfechtung  
geraten / als soltestu von Gott ver  
lassen sein / der du doch das aller  
liebste Gottes Kind warest / viel  
lieber als alle deine Feinde / an  
welches gehorsam Gott dein Him  
lischer Vater seine höchste freude  
vnd gefallen hatte. In schweren  
nöten gedünckts vns wol / als zör  
ne Gott mit vns / vnd lache mit  
der Welt / ja als sein wir von Gott  
gar verlassen. Gott hat vns als  
denn zum liebsten / vnd ist vns am  
aller nehesten. Endlich hat dir /  
Herr Christe / die grosse schmerke  
vnd pein des Todes dein getrewes  
Herz abgebrochen / vnd hast dei  
nen heiligen Geist auffgegeben /  
vnd bist in den henden deines him  
lischen Vaters verschieden. Himmel  
vnd Erde hat sich dafür entsetzt /  
aber

n. A. 100

aber die Zuden haben sich nicht  
entsetzt / sondern sind verstockt ge-  
blieben.

Hiermit aber / vnd hiedurch /  
hastu ausgericht / dein Fürstlichs  
vnd dein Priesterlichs ampt / da-  
zu du von Gott deinem himlischen  
Vater gesalbet / gesand / vnd auff  
Erden komen warest. Dis ist das  
λύτρον, das raunson geld / vnd die  
bezalung / die du für vnser Sünde  
gegeben hast. Denn du hast nicht  
mit Kalber vnd Bocksblood / auch  
nicht mit silber vñ golde / sondern  
mit deinem eigen Blute bezalet /  
vnd hast vns dadurch eine ewige  
erlösung erworben.

So haben wir nun durch sol-  
che deine bezalung vnd erlösung /  
ewige gerechtigkeit / ewige kind-  
schafft / vnd ewiges leben / wir / sa-  
ge

ge ich / die wir an deinem namen  
glauben / vnd durch solchen Glau-  
ben / in der Tauffe / zu aller deiner  
güter gemeinschaft / dir eingelei-  
bet sind. Denn dis bezeuget dein  
heiliges vnd warhafftiges Wort /  
darauß man diese heilige tag vber  
gute achtung geben sol.

Ephes. 1. Durch Christum  
haben wir die erlösung / durch sein  
Blut / nemlich die vergebung der  
Sünde. Er spricht nicht / wir wer-  
den sie haben / sondern wir ha-  
ben sie schon empfangen in vnser  
Tauffe.

Tit. 3. *Seruator noster saluos  
nos fecit.* Vnser Heiland hat vns  
selig gemacht / spricht nicht / er  
wird vns selig machen. Wir ha-  
ben die seligkeit schon hinweg / vnd  
bedürffen nicht mehr zu solchem  
grossen

grossen gute / denn das wirs von  
herzen gleuben / vnd vns sein hertz  
lich erfreuen.

Daniel. 9. Siebenzig wochen  
sind bestimpt vber dein Volck / vnd  
vber deine heilige Stad / so wird  
dem vbertreten gewehret / vnd die  
Sünde zugesiegelt / vnd die mis-  
sethat versünet / vnd die Ewige  
Gerechtigkeit gebracht.

Esaia 55. Höret mir zu / spricht  
der Herr / was ich euch sagen vnd  
verkündigen wil / so wird ewer  
Seele in freuden leben. Ich wil  
mit euch ein Ewigen bund mach-  
en / nemlich / die gewisse gnaden  
Dauids.

Esa. 54. Es sollen wol Berge  
weichen / vnd Hügel hinfallen /  
aber meine Gnade sol nicht von  
dir weichen / vnd der Bund mei-  
nes



nes friedes sol nicht hinfallen /  
spricht der Herr dein Erbarmer.

Ezech. 37. Ich wil meinen Geist  
in euch geben / das jr wider leben  
sollet. Ich wil sie wider in jr Land  
bringen / vnd wil ein etnig Volck  
aus ihnen mache. Vnd mein Knecht  
David sol jr König / vnd jr aller  
einiger Hirte sein. Ja mein Knecht  
David sol ewiglich jr Fürst  
sein. Vnd ich wil mit ihnen ein  
Bund des Friedes machen / das  
sol ein ewiger bund sein mit ihnen.

Iſe 2. Ich wil mich mit dir  
verloben in ewigkeit / Ich wil  
mich mit dir vertrauen in Ge-  
rechtigkeit vnd Gericht / in Gna-  
de vnd barmherzigkeit / ja im  
Glauben wil ich mich mit dir ver-  
loben.

Iſe

Osae 6. Die gnade / so ich euch  
erzeigen wil / wird sein wie ein  
Tauwolcken des morgens / vnd  
wie ein Tau / der frue morgens  
sich ausbreitet.

Osae 14. Gerne wil ich sie lie-  
ben / vnd mein zorn sol von inen  
wenden. Ich wil Israel wie ein  
Tau sein / das er sol blühen / wie  
eine Rose / vnd seine wurzeln sol-  
len ausschlagen / wie Libanon.

Osae 13. Ich wil sie erlösen  
aus der Helle / vnd vom Tode er-  
retten. Tod / ich wil dir ein Bisse  
sein / Helle / ich wil dir eine Pestil-  
lentz sein. Doch ist der trost für  
meinen augen verborgen.

Joh. 10. Ich gebe inen das  
ewige leben / vnd niemand wird  
sie mir aus meiner hand reißen.

So

So sind wir nun/ allerliebster  
Herr vnd Bruder/ Jesu Christes/  
durch dein leiden vnd sterben/ wi-  
derumb zum vorigen stande vnd  
zur vorigen herligkeit gekomē/ da-  
raus wir gefallen waren/ sinte-  
mal wir in dir haben newe vnd  
vollenkommen gerechtigkeit/ Got-  
tes Kindschafft/ vnd das ewige le-  
ben. Vnd sind nun vberaus selige  
Leute worden/ das vns niemand  
mit fug einerley Eünde beschül-  
digen/ vnd verdammen kan/  
ja das wirs den heiligen Engeln  
weit zuvor thun/ nach dem mal  
wir nicht Engelische Gerechtig-  
keit/ sondern dein selbs eigen Ge-  
rechtigkeit erlanget vud angezo-  
gen haben. Izt mügē wir vns bil-  
lich/ vber solchem vnsern grossen  
heil erfrewen/ mit vnaussprech-  
licher

stiller vnd ewiger freude / auch  
mitten im Creutz / vnd sicherlich  
wonen in solcher ruge vnd in heu-  
fern des friedes.

Solche deine grosse liebe vnd  
trewe gegen vns / vnd solche deine  
grosse wolthat / erkennen wir /  
Herr Christe / in aller danckbar-  
keit / doch gleichwol nicht in volen  
komenheit / Vnd sagen dir dafür /  
nebe dem / das du vns aus der giff-  
tigen seuche der Pestilenz gar gne-  
diglich geholffen / von hertzen lob /  
preis / vnd danck / mit dem erbies-  
ten / das wir dich widerumb wol-  
len lieben / dir in aller vnterthe-  
nigkeit gehorchen / sünde meiden /  
warer heiligkeit vnd gerechtigkeit  
vns besleissigen / einer den andern  
mit trewen meinen / vnd da es an  
dem / das wir auch der mal eins  
vns

Unser armes blut an deines na-  
mens ehre sollen wenden / das wir  
hierinne / durch deines Geistes  
Krafft / wollen gehorsame /  
vnd gutwillig er-  
funden wer-  
den.

## Belarter Leute Sprüche von dem Leiden vnd ster- ben Jesu Christi.

Philip. Malanth. in Euangel.  
domin. pag. 24.

**C**onditus erat homo ad excellen-  
tem dignitatem, vt esset imago Dei,  
id est, vt in homine semper luceret  
notitia Dei, & Deus in eo habita-  
ret, & eo delectaretur, ibi acqui-  
esceret ac Sabbatum ageret, & ho-

B 2 mines

mines verè laudarent Deum. Hanc  
tantam dignitatem amisit Adam suo  
lapsu, & iam æternam iram merue-  
rat, sicut Diaboli, nec vlla creatura  
placare Deum poterat, nec vllum  
erat par precium pro peccato. Ideò  
Filius Dei intercessit illi magnæ &  
horrendæ iræ, & subiuit pœnam pro  
nobis.

David Chytræus, in Epistolis,  
pag. 171.

Nullius creaturæ sapientia per-  
uestigare potest causas mirandi con-  
sily diuini, de redemptione generis hu-  
mani, hoc modo perficienda, vt Fili-  
us Dei pro nobis deprecaretur, &  
assumpta nostra natura fieret victi-  
ma. Sed tamen in hac vita vult  
Deus considerationem illius miran-  
di decreti incoari,

Philip.

Philip. pag. 13.

**C**um intelligimus admirabili consilio æterni patris constitutum, ut hic filius qui apud ipsum ab æterno fuit, ad nos descenderet, ac fieret homo et victima pro nobis, agnoscamus hanc immensam magnitudinem bonitatis diuinæ erga nos. Quo enim pignore potuit Deus magis testari, quod verè nos curet ac diligat, quam dato Filio, cui verè communicauit essentiam suam? Sicut de consilio Patris ipse Christus inquit: Sic Deus dilexit mundum, ut filium suum unigenitum daret.

Ioannes Brentius, de diuina maiestate Christi. pag. 31.

**N**on est obscurum, quòd non diuina, sed tantum humana natura sit obnoxia passioni & morti: Et ta-

B 3

men

men in passione et morte Christi diuina natura, quæ in se est impassibilis et immortalis, tam præseñter affuit hu- manæ naturæ patienti & morienti, vt ne tunc quidem personæ vnitas sit separata. Nec affuit tantū sicut Ste- phano, aut Petro, aut Paulo mori- enti, sed ita personaliter affuit, vt verè dicatur, Deum ipsum esse pas- sum ac mortuum. Videamus, inquit Cyrillus, ipsam hominis animam, si quid corpus passum fuerit, extra pas- sionem quidem manentem, quantum pertineat ad naturam, attamen non extra passionem esse intelligi, eo quòd proprium sit corpus ipsius, quod patitur, & licet incontigua sit & sim- plex, tamen id quod patitur, non alienum est. Sic intelligo etiam de Christo omnium saluatore, quòd com- municarit quidem passioni vnigeniæ



tus, quantum pertinet ad familiaritatem corporis sui, manserit autem passionis expertus, ut Deus. Et iterum: Affirmamus propter familiaritatem quidem carnis eum infirmitates fuisse perpeffum, seruasse verò suæ naturæ impassibilitatem. Hic rectè & piè docet Cyrillus, quod Deus natura sua nihil patiatur, & tamen propter familiaritatem carnis communicauit passioni, & perpeffus sit infirmitates.

**Urbanus Regius, im Sermon von  
der frucht des Leidens  
Christi.**

Des leidens Christi verdienst  
were gnug / nicht allein für die  
sünde einer Welt / sondern / wenn  
ir viel tausent / noch mehr gesün-  
diget hetten. Denn Christus ist  
B iij ein

ein vnſchetzliche / vnendliche Per-  
ſon / welcher leben vnausprech-  
licher würdigkeit iſt / dieweil ſeine  
Seele der vbergebenedeiten Gott  
heit vereinigt / vnd ſein trewer  
dienſt / aus der aller gröſten liebe  
gefloſſen iſt. Ob er ſagen wolt.  
Dis macht das leiden Chriſti ſo  
fruchtbar vñ krefftig / das ſein per-  
ſon / welche gelitten / nicht allein  
ein Menſch / ſondern auch ein wa-  
rer Gott iſt. Vnd das darumb  
ſein Blut / welches er vergoſſen /  
nicht allein für Menſchen blut /  
ſondern auch für Gottes blut ſol  
gerechnet werden / Als geſchrie-  
ben ſtehet / Actor. 20. Gott hat  
ſeine Gemeine durch ſein eigen  
blut erworben.

Doctor Lutherus / in der Kirchen  
Poſtil / fol. 127.

Chriſt

Christus hat nicht allein die  
werck gethan / die er nicht schuldig  
war zu thun / sondern hat auch  
gelitten die straffe / williglich vnd  
vnschuldiglich / so das Gesetz  
drewet vnd vrtellet ober die / die  
es nicht halten. Das gleich seine  
vnschuld zweyfaltig hie ist / Eine /  
das er nicht hette dürffen leiden /  
ob er schon kein Gesetz gehalten  
hette. Die ander / das er aus obri-  
gem guten willen gehalten / auch  
desselben halben nicht schuldig  
war zu leiden.

Henricus Rothe / pag. 218.

Christus Jesus bezaleet mit  
seinem Blute für alle schuld / die  
Adam mit seinem fall gemacht /  
vnd wir durch in ererbet haben.  
Dieser Jesus Christus hat durch  
sein leiden vnd sterben / durch sein  
A v blut

Blut vnd tod / einen strich durch  
vnsere Schuldbuch der Sünden  
gemacht / vnd ohne denselbigen  
wird auch in der Göttlichen Ren-  
terey keine rechnung passirn / wo  
sie nicht mit dem Blut Jesu Chri-  
sti quitirt ist. Vergossen ist dein  
teures blut / das gnug für die sün-  
de thut.

*David Chytræus, in 26. caput*

*Matthæi, pag. 528.*

*Monachi fingunt Christum pro  
peccato originis tantum passum esse:  
sed pro sequentibus peccatis actuali-  
bus singulos oportere proprijs operi-  
bus & afflictionibus satis facere.  
Hanc impiam, & in sacrificium  
Christi blasphemam & contumelio-  
sam opinionem perspicue refutant  
pleraq; dicta, in quibus sine vlllo dis-  
crimine originalis & actualium sim-  
plia*

placiter omnium peccatorum remissio, propter solius Christi sacrificium donari adseueratur, 1. Iob. 2. Sanguis Iesu Christi emundat nos ab omni peccato. Quod autem Paulus, Rom. 3. dicit, Deum posuisse Christum propitiatorem per fidem in sanguine eius, ad ostendendam iustitiam suam, propter remissionem praeteritorum peccatorum, id ad omnia tempora pertinet. Quandoque enim fit remissio lapsuum, fit remissio praecedentium peccatorum, quae prius extiterunt, & quae adsunt.

Pag. 530.

Nullum est sacrificium aut opus, quod mereatur remissionem peccatorum, & vitam aeternam, praeter unicum Christi sacrificium semel in cruce factum, Ebr. 10. Impossibile est, sanguine Taurorum & Hircorum  
telli

colligi peccata. Christus enim una obla-  
tione consummauit in perpetuum san-  
ctificandos. Ebr. 9. Christus per pro-  
prium sanguinem ingressus est semel  
in sancta, eternam redemptionem  
inueniens.

D. Nicolaus Selneccerus / in  
der Tauffpredigt  
zu Zella.

**D**ies ist nun vnser höchste wirde,  
vñ vnser grosse herligkeit / wider alle  
Hellen pforten / das wir gereiniget  
vnd abgewaschen sind mit dem tew-  
ren blut Jesu Christi von allen vñ-  
fern Sünden. Hie mus hinweg fals-  
len / verschwinden / vnd zu schanden  
werden / alles das vns an vnser See-  
len heil vnd seligkeit schaden wil.

Luth. Tom. 4. Germanico, ad dia-  
ctum, Gal. 1. Christus hat sich  
selbs für vnser Sünde  
gegeben.

Ob

Ob wol die Sünde ein grausamer Tyrann ist / welcher den frommen / weil sie noch im fleisch leben / viel zu leide thut / schrecket / vnd betrübet / Dennoch kan sie nicht mehr thun. Denn wenn sie sich wider ermannen / vnd mit dem Glauben diesen spruch fassen / Christus hat sich selbs für vnser Sünde gegeben / ist inen die Sünde nicht mehr schrecklich.

Christoff Bischer / in derselbigen  
Taufspredigt / zu Zell gethan.

Wie warm Bocksblut das gelieferte geblüt / so sich vom fall verursacht / zerteilet / vnd vom Herzen treibet / Also vnd viel mehr machet vns das teure Blut vnser Herrn Jesu Christi / des rechten versöner Bocks / so fern es durch das rechte Feuer / den heiligen Geist / in vnsern Herzen erwarmet / lufft vnd raumt zum Herzen. Es zertreibt vnd zerteilet das gelieferte geblüte / das sich von wegen des schweren mörderlichen fals Ada vnd Luz vmb vnser Herz  
ge

gelegt / vnd vns dasselbige abzudrücken / einiger not / vorhabens ist / vnd wirckt in vns lebendigen trost / fried vnd freud / das wir / als das Königlichliche Priestertumb Gottes / mit dem Blute Christi besprenget / mit aller freudigkeit in das allerheiligste eingehen / vnd für den Gnadenstul Gottes getrost treten mögen.

*Ibid.*

Christus Jesus / Gottes vnd Mariæ Son / verdienet vns die seligkeit / mit seinem bitteren leiden vnd sterben / Vnd verschreibt vns mit der schönen Rubriken seines tewren Bluts / durch den höchsten Notarium / den heiligen Geist / ewige freude / vnd ewiges leben.

*Urbanus Regius, Catech.*

*pag. 59.*

*Mors Christi est gaudium & triumphus conscientiae nostrae: quia per illam Deus abstulit iudicium nostrum,*



strum, & auertit inimicos nostros,  
quemadmodum Sophoniae 3. dicitur.  
Innocentia enim Christi potentior est  
omni iniustitia nostra, & omnibus  
peccatis nostris, & totius mundi.

Jeronymus Beller/

in Antidoto.

Darumb hat mich mein lieber  
Herr Jesus Christus gerechtfertiget  
vnd geheiliget durch sein Blut/ das  
ich mich in diesem vnd in jenem le-  
ben in jm freuen vnd leben sol. Wie  
im 22. psalm geschrieben stehet/  
Freuet euch des Herrn / vnd seid  
frölich jr gerechten / vnd rhümet alle  
frommen. Item / psalm. 33. Freuet  
euch des Herrn jr gerechten / die fro-  
men sollen in schon preisen.

Lutherus / in der Kirchenpostill /  
pag. 157.

Denn zugleich wie der Tod vber  
in siele / vnd tödtet in / vnd hatte  
doch kein recht noch ursache zu jm/  
vnd er sich willig vnd vnschuldig  
darun

Darunter gab / vnd lies sich tödten /  
Damit ist im der Todt schuldig wor  
den / hat im vnrecht gethan / vnd an  
im gesündiget / sich selbs allerding  
verwarlost / das Christus ein redlich  
anspruch zu im hat. So ist nu das  
vnrecht so gros / das er an im ver  
wirckt hat / das der Tod nicht bezah  
len noch büssen mag. Darumb mus  
er vnter Christo / vnd in seiner ge  
walt sein ewiglich / Vnd ist also der  
Tod in Christo überwunden vnd er  
würgt. Nu aber das Christus nicht  
für sich selbs / sondern für vns ge  
than hat / vnd vns dieselbige über  
windung des Todes geschenckt in der  
Taufe / So müssen auch alle / die an  
Christum glauben / des Todes Herrn  
sein / der Tod jr vnterthan / ja jr vbel  
theter / den sie richten vnd abthun  
sollen / Wie sie denn thun  
im sterben vnd ans  
Jüngsten  
tage.

Vcn

# Von dem Abendmal

des Herrn.

Was ist das Abendmal  
des Herrn.

**A**ntwort. Es ist ein Abendmal des waren leibes vnd bluts Jesu Christi / von dem Herrn selbs darumb eingesetzt / das man seines todes da bey gedencke.

Denn in der Nacht / do er mit seinen lieben Jüngern das Osterslemblin gegessen / vnd von Juda verraten ward / nam er Brod in seine hand / dancket Gott / brachs / vnd gabs den Jüngern / vnd sprach / Nemet / esset / das ist mein Leib / der für euch gegeben wird. Desselben gleichen auch den Kelch nach dem abendmal / vnd sprach / Nemet / trincket alle daraus / das ist mein Blut des newen Testaments / welches für euch vergossen wird.

Hie bezeuget der Herr Christus selbs klerlich / das das Brod in seiner  
**C** hand /

hand / sein heiliger vnd warer leib  
sey / vnsernt halben geopffert am  
Creuz: Vnd der Wein im gülden  
Kelch sein heiliges wares blut sey/  
vnsernt halben vergossen am Creuz.  
Was wollen wir nun anders daraus  
machen?

Gleicher gestalt beschreibt auch  
S. Paulus das heilige Abendmal  
des Herrn. 1 Cor. 10. Das Brod / das  
wir brechen / ist das nicht die gemein-  
schafft des Leibes Christi? Vnd der  
gesegnete Kelch / welchen wir seg-  
nen / ist das nicht die gemeinschafft  
des Bluts Christi? Ob er sagen wolt.  
Im abendmal des Herrn / wenn wir  
das Brod essen / vnd den Wein trin-  
cken / werden wir alle / ins gemein-  
teilhafftig des waren vnd wesent-  
lichen leibs vnd bluts Jesu Christi /  
nicht allein des Brods vnd Weins /  
sondern auch / vnd fürnemlich des  
leibs vnd bluts Jesu Christi. Wir es-  
sen den leib / vnd trincken das blut /  
jedoch heimlicher vnd verborgener  
weise / auff das der glaube seine stat  
vnd vbung habe. D.

D. Lutherus / in seinem kleinen Catechismo / welchen ein jeder Christ von wort zu wort auswendig wissen sol / leret nicht anders / Denn daselbs spricht er ausdrücklich also / das das Sacrament des Altars der ware leib vnd das ware blut vnser Herrn vñ Heilands Jesu Christi sey / vnter dem Brod vnd Wein / vns Christen zu essen vnd zu trincken / von Christo selbst eingesezt.

Es sagt alhie Doctor Luther / Christi leib sey vnter dem Brod / vñ Christi blut sey vnter dem Wein / das mit niemand gedencke / das brot sey zu nicht worden / vnd in den leib Christi verwandelt : vnd der Wein sey auch zu nicht worden / vñ in das blut Christi verwandelt / vnd darauff anhebe / aus Papistischer anschacht vñ aberglauben / das gesegnete brot vnd den gesegneten Wein anzuberen. Welchs eine gewliche abgötterey were. Brot ist vñ bleibet brot. Wein ist vnd bleibet Wein. Aber mit dem brot / in dem brot / vnd vnter

C ij dem

Dem brot / wird vns verreichet vñ dar  
gegeben der ware leib Christi / vñ vn-  
ter dem Wein das ware blut Christi.

Hie möcht aber einer gedencen vñ  
fragen / Wie kan vns Christus seinen  
leib zu essen / vñ sein blut zu trincken  
geben? Antwort. Wie so nicht? Hat  
ers doch geredt / vnd ist dazu ein wa-  
rer Gott / mit seinem himlischen Va-  
ter. Der viel grösser ding thun kan /  
Wie solt er dis nicht thun können?  
Der mir seinen heiligen Geist gibet /  
das vnbegreifliche gut / Wie solt er  
mir nicht seinen leib vnd sein blut zu  
essen vnd zu trincken geben können?  
Deus noster in caelo omnia quaecunq;  
voluit fecit. Ach es ist nur ein gespöte  
des leidigen Teuffels / vnd eine leste-  
rung der hohen maiestet Christi / vñ  
der hoffertigen Geister straff vñ plas-  
ge / dem hellen Wort Gottes wider  
bellen / jm eine nasen andrehen / vnd  
die gegenwertigkeit des waren leibs  
vnd bluts Christi im heiligen Abend-  
mal verneinē. Wer lust dazu hat / der  
treibe seinen mutwillen / vñ disputire  
mit Christo lang gnug darumb / Wie

wollen vns an seinem Wort benügen  
lassen / vnd an dieser leiblichen vnd  
heilsamen speise keinen eckel tragen.  
O Herr Christe / speise du mich nur  
teglig mit deinem fleisch / vnd trenn  
ck mich mit deinem blut / ex pacto  
tuo, Du solt mir ein werder vnd an  
genemer Gast sein.

II.

Warumb hat der Herr Christus  
seinen Jüngern / vnd vns allen / solch  
eine heilige / hohe / vnd thewre malzeit  
eingesetzt vnd verordnet ?

Antwort. Auff das sie eine erinne  
rung oder gedechtnis sey / seines bit  
tern leidens vñ sterbens / für vns ges  
schehē / nach diesem spruch / Solchs  
thut zu meinem gedechtnis. Denn  
gleich wie die Juden im alten Testa  
ment ein gedechtnis hatten der wun  
derbarē erlösung / damit sie Christus  
aus der hand Pharaonis / vnd aus  
dem roten Meer erlöset hatte / nem  
lich das Osterlembli / Exodi 12. Al  
so hat vns auch der Herr Christus im  
newen Testament ein gedechtnis ges

C iij      stiftet /

stiftet / der ewigen erlösung / damit  
er vns ein mal durch sein blut / von  
allen vnsern sünden / vom zorn Got-  
tes / vom bösen gewissen / von der ty-  
ranney des Teuffels vnd der Welt /  
vñ von dem ewigen Tod erlöset hat.

Wir sind doch leider alzu vergesse-  
ne Leute / vnd vergessen nichts ehe  
denn wolthaten / darumb mus vns  
der Herr Christus selbs / nicht allein  
durch sein wort / sondern auch durch  
andere mittel vñ ceremonien / seiner  
grossen vnd seligmachenden woltha-  
ten erinnern / vnd sie vns helffen in  
steter gedechtnis erhalten.

Diese liebe vñ trew Christi preiset  
David im 111 Psalm / mit diese wor-  
ten / Er hat ein gedechtnis gestiftet  
seiner wunder / der gnedige vñ barm-  
herzige Herr. Welche wort Davids  
D. Luther vber denselben psalm also  
ausleget / Merck den feinen namen /  
damit er das Sacrament nennet / vñ  
spricht / Ein gedechtnis seiner wun-  
der. Wer hie lust hette / Tafeln auff  
den Altar zu setzen / der solte lassen  
das Abendmal Christi malen / vnd



diese zween Vers / Der gnedige vnd  
barmherzige Herr hat eingedeck  
nis seiner wunder gestiffet / mit gro  
ssen güldē buchstaben vmbher schrei  
ben. Wie ist doch dis so hertzlich  
vnd freundlich gered / für die armen  
betrübten Sünder / vnd elenden er  
schrocken gewissen. Vnd ich weis  
nicht / ob Gott irgend in der schrifft  
lieblicher sich nennen lasse.

Darumb ist billich vñ recht / das  
man bey dem Abendmal des Herrn /  
aus Gottes Wort / von dem blut vñ  
tode Jesu Christi / sonderliche erinne  
rung thue / Vnd das sich auch ein je  
der selbs in seinem eigē gewissen / mit  
höchster andacht solcher wolthat er  
innere. Denn du gehest nicht hinzu /  
mein lieber freund / alter gewonheit  
halben / auch nicht deiner schönen  
Kleider halben / sondern auff das du  
dich alda erinnern lassdest / vnd dich  
auch selbst erinnerst / des leidens vnd  
sterbens deines lieben Heilands Jesu  
Christi. Darumb gedenc / vñ sprich  
in deinem hertzē also: Ach du fromer

E iij Gott

Gottes Son/du aller freundlichster  
vnd lieblichster Herr/was hastu vns  
armen Menschen/ja vns armen Sün-  
dern für vberschwengliche vñ vnaus-  
sprechliche wolthaten erzeiget? Du  
bist aus grosser lieb ein Mensch vnd  
vnsrer Bruder worden. Vnsrer Sünde  
hastu auff dich geladen/vñ den zorn  
Gottes hastu getragen. Deinen heiligs-  
gen zarten leib hastu auffgeopffert  
am Creutz / vnd dein heiliges Blut  
hastu vergossen am Creutz. Den nach  
vieler angelegter schmach vñ marter  
haben dir deine feinde/der du viel ge-  
habt/deine hend vnd füsse durchges-  
graben/vñ dich zwischen zween Mör-  
dern am Creutz geschlagen/vnd dein  
nen leib also ausgedenet / das man  
alle deine Knochen hat zelen können.  
Blut ist dir aus deinen heiligen fünff  
wunden / vber deinen ganzen leib/  
auff die Erde geflossen. Welchs ohn  
zweiffel die verbitterten Juden mit  
füssen getreten haben. Da haben sie  
ire lust vnd freude an dir geschawet/  
vnd haben deiner in den höchsten  
schmerzen gespottet. Daselbst hastu

geruffen/ vnd endlich deinen heilige  
Geist auffgegeben. Ach warumb ist  
doch solchs alles von dir geschehen?  
Warumb hastu solchs gethan? Es  
ist aus grosser liebe von dir gesche  
hen/das man deine liebe daraus er  
kennete/ vñ das du/durch solch dein  
Opffer/vns arme Sünder von allen  
vnsern Sünden/vom zorn Gottes/  
vñ von dem ewigen Tode erlösetest/  
vnd das wir durch deine wunden ge  
heilt würden/vñ in vnserm gewissen  
friede vnd freude hetten. Für solche  
deine grosse liebe vnd wolthat/sage  
ich dir/O Herr Christe/von hertzen/  
ewig lob/preis vnd danck/vnd bin  
bereit/mein armes blut/vmb deines  
heiligen namens ehre willen/wider  
umb zu vergiessen. Das ist die erste  
ursach.

Zum andern gibt er vns auch dar  
umb seinen Leib zu essen / vnd sein  
Blut zu trincken / auff das er sich  
mit vns vereinige. Sihe so grosse  
lust hat dein lieber Breutigam vnd  
Erlöser zu dir / das er auch selbs zu  
E v x die

dir komen wil / vnd in dir wonen/  
leibhafftig / vnd dein hertz zu seinem  
heiligen Tempel machen / vnd sich al  
so mit dir vereinigen / Wie er spricht  
Leuit. 26. Inambulabo in eis, & inha-  
bitabo. Ich wil in jnen wonen vnd  
wandeln.

Hilff Gott / welche ehre vnd trost  
ist vns dis / den Herrn selbs in vns  
wonend haben? Wer kan wider vns  
sein / wenn dieser Held in vns / vnd  
für vns ist. Aber diesen trost wollen  
die Feinde vnd Verechter dieses Sa-  
craments nicht haben / So mügen  
sie es auch lassen.

III.

### Wie sol man dieses Abendmals recht gebrauchen?

Man sol es nicht allein mit dem  
munde / sondern auch mit dem hertzē  
essen vnd trincken. Das ist. Ein jeder  
Christ sol für sein person gleubē / das  
der Leib / den er jzt zu sich nimet / für  
jn in den Tod gegeben / vnd das das  
Blut / welchs er jzt trincket / für jn  
vergossen sey / zu vergebung aller  
seiner Sünden. O

O mein Herr Jesu Christe / ich glenb  
von hertzen / das dein Leib für mich  
gegeben / vnd dein blut für mich ver  
gossen sey. Vñ glenbe auch dazu / das  
ich aus deinem gecreuzigte leibe / vñ  
vorgossenem Blute / vergebung meis  
ner Sünden / die Kindschafft Got  
tes / vnd das Ewige leben habe.

Darumb sagt D. Luther in sei  
nem Catechismo: Essen vnd trincken  
thuts freylich nicht / Sondern die  
Wort so da stehen / Für euch gege  
ben vnd vergossen / zur vergebung  
der Sünden. Welche wort sind nebē  
dem leiblichen essen vñ trincken / als  
das heuptstück im Sacrament / vnd  
wer denselbigen Worten glenbet / der  
hat was sie sagen / vñ wie sie lauten /  
nemlich vergebung der Sünden.

Wer mit solchem Glauben hinzu  
gehet / der gehet würdig vnd frucht  
barlich hinzu / ob er schon ein armer  
Sünder ist. Wer aber nicht also hin  
gehet / der gehet vnwürdig hin / wen  
er gleich von grosser heiligkeit ein  
halber Engel were.

Doch

Doch sollen die gefallene Sünder /  
so da durchs Teuffels neid vnd list /  
aus zulassung Gottes / zu sonderliche  
schweren vnfellen gekommen / vñ von  
des wegen sonderliche beschwerung  
auff irem gewissen haben / für allen  
andern Christen in höchster demut /  
vnd wehklage irer Sünden / hinzu  
gehen / vnd das Sacrament mit wa  
rem Glauben empfangen.

III.

Was für nutz hat man den aus solcher geist  
lichen niessung / nemlich aus dem glauben  
des leibs vnd bluts Jesu Christi?

Antwort. Den heiligen Geist / vnd  
selige freude des ewigen lebens. Den  
gleich wie vns der heilige Geist gege  
ben wird / wenn wir die Predigt des  
Euangelij von Christo hören / Act.  
10. Also wird vns auch ohn zweifel  
der heilige Geist gegeben / wenn wir  
der Sacrament gebrauchen / vnd  
denselbigen gleuben.

Lutherus / in der Kirchenpost. pag. 73.

Gleubestu diesen thewren / tröst  
lichen vñ gnadenreichen Worten / so  
ists vnmüglich / das dauon dein hertz  
nicht solt den heiligen Geist empfangen

gen/warm werden/ vnd für freuden  
in Gott lachen. Denn das Euangelium  
von Christi verdienst vñ Gottes gna  
de/ist so ein liebliche predige/ das es  
den heiligen Geist mit sich bringet/  
im hören vnd predigen/ gleich wie  
der Sonnen glantz natürlich die hitze  
mit sich bringet. Dis sol von den Sa  
cramenten auch verstanden werden.

Wo nu der heilige Geist ist/ da ist er  
nicht müßig/ sondern er richtet sein  
reich in vns auff/ vñ schaffet vnsern  
herzen fried vnd freude/ welcher  
fried vnd freude des heiligen Geis  
tes das ewige leben genennet wird.

Hieher gehört der thewre Spruch  
Christi/ Ioan. 6. Wer mein fleisch  
isset/ vnd trincket mein blut/ der hat  
das ewige leben/ vnd ich werde in  
am Jüngsten tage aufferwecken. Das  
ist. Wer da gleubet/ das mein fleisch  
für in gegeben/ vñ mein blut für in  
vergoßen/ der hat vñ fület in seinem  
herzen wonne vnd freude des ewigē  
lebens. Denn wie ist möglich/ das  
der nicht solt frölich sein/ auch mit  
ten

ten in der hitze allerhand crentzes vñ  
trübsals / der da weis vnd von hertze  
glaubet / das er durch Christi blut ge-  
reiniget / ein wares Gottes kind sey.

Es ist aber tröstlich das der Herr  
spricht / Er wolle solchen glaubigen /  
der den heiligen Geist vnd die gaben  
des heiligen Geists empfangen hat /  
auferwecken am jüngsten tage. Dem  
welchem Gott der Herr das ewige le-  
ben zugesagt hat / dem gibt er auch  
zunor einen Gottespfennig / nemlich  
ein vorschmack seiner gnaden vñ der  
himlischen freude / doch offte mit hel-  
lischer angst vermischet / damit sich  
der Mensch in demüt halte / vnd sol-  
cher gnade Gottes sich nicht erhebe.  
Bey welchem aber solcher Gottes-  
pfennig gefunden wird / bey demsel-  
bigen folgt auch gewislich nach das  
ewige leben. Wie hievon D. Luther  
vber den 90. Psalm / am 447. blat /  
herlich vñ tröstlich geschrieben hat.

Darum vermane ich euch / meine lie-  
be Pfarckinder / jr wollet ja vñ ange-  
zogener vrsachē willē das Abendmal  
des



des Herrn nicht vergeblich empfangen haben / sondern dessen zum öfftermal gebrauchen / wie die Christen thetzen zur Apostelzeiten. Insonderheit aber wenn jr die kelte des glaubens / der liebe / vnd des gebets in ewrem hertzen fület. Item / so offte jr geistliche trawrigkeit vnd schrecken leidet. Vnd wenn euch armut / krankheit / verfolgung / vnd ander Creutz drückt / vnd jr keinen trost in der Welt habt. Endlich wenn jr sterben sollet. So last ja das Sacrament nicht fern von euch sein. Denn so könnet jr euch sein dabey erinnern des Todes vnd verdiensts Jesu Christi. Ir werdet des Herrn Christi teilhafftig. Ewre hertzen empfangen den heiligē Geist / vnd werden angezündet vnd brennend gemacht. Ir erlanget fried vnd freude. Vnd bringet endlich dauon eine fröliche Auferstehung / vnd das ewige leben. Was wollet jr euch für bessere güter wunschē ?

Vom

## Vom Wetter / vnd

seinem Trost.

Mag sich auch ein Christen für dem  
Wetter Gottes wol fürchten?

**A**ntwort. Nein. Ein Christen  
Mensch sol nicht fürchtam/son-  
dern stets vol grossen Glaubens vnd  
muts sein/vnd sol im gleich ein Sün-  
de vnd schande gedüncken / sich für  
den Creaturen Gottes zu fürchten.  
Je frölicher / behertzer / vnd muti-  
ger einer ist / je edler Christen er ist /  
das gleich keiner diesen hohen vnd  
thewren namen mit ehren führen vñ  
besitzen kan / wo nicht ein starcker  
Glaube vnd mut dabey ist. Vnd  
zwar / ich weis keinen andern vnter-  
scheid zwischen einem Christen vnd  
vnchristen zu machen vnd anzuzeigē/  
den das dieser in gefehrlichkeiten zag-  
hafftig / jener aber fein auffrichtig vñ  
mutig ist / doch alles in der gnade vñ  
hülffe Gottes. Wie denn auch Gott  
der Herr eben darumb die seinen in  
steter not vñ fahr leben vñ schweben  
lest/

lest / auff das jr glaube ermuntert / ge  
übt / geleutert vn̄ recht schafften wer  
de / vn̄ auch für der ganzen Welt / jm  
zu lob vnd ehren / auff's herrlichste  
daher leuchten vnd scheinen möge.

Daher vermanet vns der heilige  
Geist durch den Propheten David /  
Psal. 31 zu solcher groszügigkeit /  
vnd spricht: Seid getrost vnd vnuer  
zagt / alle die jr des Herrn harret.  
Denn kan Scipio Africanus / Hanni  
bal / vnd Julius Caesar getrost vnd  
vnuerzagt sein: Wie solt ein Christ /  
der den heiligen Geist hat / nicht viel  
mehr sich mannlich / getrost vnd vn  
uerzagt halten: Wie S. Paulus sagt /  
Ir habt nicht einē knechtlichē Geist  
empfangen / das jr euch abermal  
fürchten müstet / sondern jr habt ein  
nen kindlichen Geist empfangen /  
durch welchen wir ruffen / Abba /  
lieber Vater. Derselbige Geist gibet  
zeugnis vnserm Geist / das wir Got  
tes Kinder sein.

Vnd König Salomo Proverb. 28.  
Ein gerechter ist mutig wie ein Lew.

D

Denn

Denn ein Lew krencht nicht zu wins-  
ckel / wenn es donnert vnd blizet /  
sondern thut sich heruor / legt sich  
stracks nieder / vnd schawet zu / was  
daraus werdē wil. Er wil sich durch  
solche Cartannen das hertz nicht neh-  
men lassen / ob sich wol das ander  
Viehe hefftig fürchtet.

Ja Christus der Herr selbs / welcher  
viel mehr ist als König Salomon /  
spricht zu seinen Jüngern also / Joh.  
am 14. Erwer hertz erschrecke nicht /  
Gott geb es donner oder blize / oder  
es sey gut wetter. Dabey setzt D. Lu-  
ther diese erklerung. Christus wil so  
viel sagen / Ich weis wol / mein liebe  
Jünger / wie es euch auff Erden ges-  
hen wird. Ir werdet dem Teufel vnd  
der Welt vnter die spieße lauffen / vñ  
euch martern lassen müssen. Ir wer-  
det in mancherley not vnd fahr kom-  
men / vnd solche ding erleben / darü-  
ber euch das hertz im leib möcht zu  
schmelzē. Ja es wird euch leichtlich  
schrecken vñ zagen widerfaren / auch  
von ewren eigen hertzen. Aber rüstet  
euch

euch zu solchem Kampff / seid keck /  
vnd last euch das hertz nicht gar neh-  
men. Denn es ist darumb mit euch  
noch nicht aus / Ob euch schon der  
Teuffel / die Welt / vnd ewer eigen  
gewissen angreiffet vnd plagt / vnd jr  
sonst vielem jamer vnd gefahr vnter-  
worffen seid. Ich lebe noch / vnd jr  
seid mein / vnd es sol mit euch noch  
wol ein mal besser werden.

S. Paulus wil / das ein erwelter  
Christ in allem vertrauen zu Gott /  
vnd in solchem Lewen mut / von tag  
zu tag wachsen vnd zunemen solle /  
damit ja niemand von vns gedencke /  
es sey wider das Christentumb / oder  
wider Christliche demut / auffrich-  
tig / freymütig vnd frölich sein. Dis  
sind S. Pauli wort / 1 Cor. 15. Seid  
feste / unbeweglich / vnd nemet jmer  
zu in dem werck des Herrn. Item / 1  
Thess. 4. Wir ermanen euch / lieben  
Brüder / das jr noch völliger werdet.

Vnd welchs noch mehr ist / der heis-  
lige Geist straffet die eben hart dar-  
umb / welche eines erschrocken vnd

D ij blöden

blöden hertzens sind / insonderheit  
aber / die sich für Menschen fürchtē.  
Als Esaia 51 Du fürchtest dich teg/  
lich den ganzen tag / vnd vergiffest  
des Herrn der dich gemacht hat / der  
den Himmel ausbreitet / vnd die Erde  
gründet. Bin ich nicht dein Tröster /  
warumb fürchtestu dich denn für  
Menschen / die doch sterben / vnd als  
hew verzeret werden.

Lucæ 8. schreyen die Jünger für  
furcht / Meister / wir vergehen. Da  
schilt Christus iren vnglauben / vnd  
ires hertzen furchtsamigkeit / vnd  
spricht / O jr kleinglaubigē / wo ist nu  
ewer glaupe / vñ wo ist nu ewer mut?  
Warumb sol sich aber ein Christe für dem  
Wetter Gottes nicht fürchten?

Darumb. Denn er ist mit seinem lie/  
ben Herrn Jesu Christo ein leib / vnd  
von des wegen mit jm zugleich ein  
warhafftiges Gottes kind / Wie der  
Herr selber spricht / Joh. 15. Ich bin  
der Weinstock / jr seid die Weinrebē.  
Das ist. Ich bin ewer leib / jr seid mei  
ne glieder. Ich in euch / vnd jr in mir.  
Item

Item Ioan. I Er hat macht gegeben  
Gottes Kinder zu werden / allen die  
an seinen namen glauben. Wie sie den  
auch darumb Dij, das ist / Götter / in  
der Schrift genennet werden.

Ist dem nu aber also / nemlich / das  
wir Christi glieder / vnd mit jm zu  
gleich Gottes liebe Kinder sein / Wie  
solt den Gott vns / solche hohe thew  
re Leute / mit donner vñ blitz straffen  
können ? In vns zwar sind wir arme  
vnwürdige Sünder / aber in Christo  
sind wir gerecht / vnd die herrlichen  
Gottes Kinder. Kan doch ein leiblich  
cher Vater sein liebes Kind mit keis  
ner Feuerbüchsen zu tod schieffen /  
Wie solt denn solchs Gott der Him  
lische Vater thun können ? So wenig  
er seinen lieben Son Christum mit  
donner vñ blitz treffen kan / ebē so we  
nig kan er vns auch treffen / welche  
er selbs erwelet / vnd in seinem lieben  
Sone für seine liebe Kinder auff vnd  
angenomen hat. Las es nur jmer hin  
wettern / donnern vnd prasseln / bliz  
zen vñ plazen / es gilt dir nicht / son

D iij      dern

bern den grossen Giganten / vnd ver-  
stockten hertzen / welche irem lieben  
Gott vn̄ Schöpffer stracks zuwider  
leben / vnd keren sich an keine verma-  
nung vnd drawung. Es ist Gottes  
wetter / vnd Gottes herrligkeit / wel-  
che das Erdreich los vnd fruchtbar  
machtet. Es wird auff dis grünen vn̄  
auff diese erschreckliche fiewerschlege  
bald ein milder regen erfolgen / der  
wird das laub aus den bewomen / vn̄  
das gras aus der erden locken. Sige  
du nur fein stille / als ein einfeltiges  
fromes kindlin in dem schoffe seiner  
Mutter / vnd las deinen lieben Gott  
walten / du solt kein schaden bekomē.

Zum andern sol sich ein Christen  
darumb nicht fürchtē / vn̄ zu winckel  
kriechen / wenns vmb in her leuch-  
tet vnd schmettert / aus allen vier ör-  
ten der Welt / vnd es gleich lauter  
fiewer regnete / das im Gott reiche zu-  
sage gethan hat / veterliches schuzes  
vnd schirmes. So lauten aber die zu-  
sagungen Gottes / psal. 91. Er wird  
dich mit seinen sittichen decken / vnd  
dein schuz wird sein vnter seinen flüß



geln. Es wird dir kein vbel begegē/  
vnd keine plage zu deiner hütten sich  
nahen. Den̄ er hat seinen Engeln be-  
fohlen vber dir / das sie dich behüten  
auff allen deinen wegen. Esa. am 53.  
Fürchte dich nicht / den̄ ich hab dich  
erlöset. Ich hab dich bey deinem na-  
men geruffen / du bist mein. So du  
durchs Wasser gehest / wil ich bey dir  
sein / das dich die ströme nicht sollen  
erseuffen / vnd so du ins feuer gehest  
soltu nicht brennen / vñ die flamē sol  
dich nicht anzünden / Denn ich bin  
der Herr dein Gott / der heilige in  
Israel / dein Heiland.

Insonderheit aber wil Gott ein  
fleißiges auffsehen habē auff die lies-  
ben Kinder / welche jren Eltern gehor-  
sam sein / gern zur Schulen vnd zur  
Kirchen gehen / gern beten / arbeitē /  
vnd in aller demut ein nüchtern vnd  
züchtig leben führen. Unaussprechlich  
ists / wie hertzlich lieb Gott solche Kin-  
der hat / vnd wie jm grawet für dem  
Gottlosen vñ schandbaren hauffen.

Hieher gehört der 122. Psalm /  
D iij wels

welchen vnser Kinder von Soltwedel  
heut auswendig lernen sollen.

Jch hebe meine augē auff zu den ber-  
gen/von welche mir hülffe kömet.

Meine hülffe kömet vom Herrn/der  
Himmel vnd Erden gemacht hat.

Er wird deinē fus nicht gleitē lassen/  
vñ der dich behütet/schlefft nicht.

Sihe/der Hüter Israel schlefft noch  
schlummert nicht.

Der Herr behütet dich/Der Herr ist  
dein schatten vber deiner rechten  
hand.

Das dich des tages die Sonne nicht  
steche/nach der Mond des nachts.

Der Herr behüte dich für allem vbel/  
Er behüte deine Seele.

Der Herr behüte deinen ausgang vñ  
ausgang/von nu an bis in ewigkeit.

Ist den nu Gott vnd seine heilige  
Engel für vns/Wer kan denn wider  
vns sein? So wollen wir vns nicht  
fürchten/wenn gleich Berge ins  
Meer süncken. Gott stercke nur vn-  
sern schwachen Glauben.

Einrede.

31

Ja/möchtestu sprechen/ Ich bin  
ein armer Sünder / vnd habe meine  
zehen gebot nicht gehalten/darumb  
wird mich Gott/laut seiner dreywüg/  
mit donner vnd blitz straffen. Ant-  
wort. Erkennestu dich für ein armen  
Sünder/vnd leffest dir deine Sünde  
herglichen leid sein/vñ gedenckest dich  
zu bessern/so wil Gott mit dir nicht  
handeln nach deinen sünden/vñ mit  
dir nicht ins gericht gehen/vnd dich  
keins weges mit donner vñ blitz straf-  
fen. Den es stehet von jm geschrieben  
im 71 Psalm / Er wird des armen  
schonen. Des armen/nemlich/der sei-  
ne Sünde recht erkennet / vnd von  
hertzen berewet. Welcher krum vnd  
gebückt herein gehet / vñ ist nach der  
gnaden Gottes hungrig vnd durstig.  
Ja Gott der Herr hat grösser gefal-  
len/die sich also erkennen/vñ in fürch-  
ten / als an allen stolzen Heiligen/  
welche von keiner sünde wollen wis-  
sen. Leset hievon den 147. Psalm.

Daher hat Herodotus vnd andere  
kluge Heiden gesagt/ das Gott keine

D v      Wärme

Wurmlein mit Donner schlahe/ son-  
dern nur allein die grossen dickē Ele-  
phanten/ Eichen/ Thürme/ Berge/  
vnd was dergleichen in der Welt  
hoch/ gros/ mechtig/ Gotlos/ stolz/  
frech vnd vbermütig ist.

### Racht.

Damit du aber/ lieber Mensch/ für  
dem Wetter / vnd für der hand vnd  
straffe Gottes desto sicherer sein vnd  
bleibē mögest/ soltu dis thun. Begib  
dich / durch ein ernstes gebet/ vnter  
die flügel / das ist/ vnter den schutz  
vñ schirm Gottes deines himlischen  
Vaters/ vñ sprich also zu jm: Ach du  
mein lieber Gott vnd Vater/ der du  
mir das leben vnd seligkeit/ zu deinen  
heiligen Göttlichen ehren/ aus gna-  
dē geschenckt hast/ ich bitte dich von  
grund meines hertzen/ im namen dei-  
nes allerliebsten Sons Jesu Christi/  
du wollest mir mein leben/ in dieser  
grossen not vñ gefahr/ zu deinen heil-  
ligē ehren/ gnediglich erhalten. Was  
ist nütz an meinem verderben? War-  
um woltestu mich vmbsonst geschaf-

fen haben? Raffe mich ja nicht weg  
mit den Gottlosen/in der helffte mei  
ner jare. Ich kan dir ja noch ein lange  
zeit dienen. Ach Herr/im tode geden  
cket man dein nicht / vñ in der erden  
rhümet man deine wolthaten nicht.  
Las ja dis schreckliche Wetter für  
meiner thür auff's gnedigst fürüber  
gehen / vnd las es ja den geringsten  
keinen von den meinen verfahren. Be  
hüte vns semplich wie deinen Aug  
apffel. Behüte mein haus vnd hoff/  
Acker vnd Viehe/ vnd alles was du  
mir aus gnaden gegeben hast. Gib mir  
auch ein Christlich vnd mannlich  
herz/vnd dein Wort vnd Geist ent  
halte mich/das ich vnter diesem vna  
gewitter nicht verzage noch Kleinmü  
tig werde. Vnd da ich dich/O du fro  
mer Gott/mein leben lang womit er  
zörnet hette/das wollestu mir barm  
herziglich verzeihen/vñ deine straffe  
hieher nicht sparen. Straffe mich ja  
nicht in deinem zorn / vnd züchtige  
mich nicht in deinem grim. Mein le  
ben wil ich/ durch deine hülffe/gern  
bes

bessern. Vnd du Herr Jesu Christe/  
bitte du auch für vns/ vnd las vns  
deiner fürbitte reichlich genießen.

Hierauff singe man in starckem  
glauben / Gott der Vater won vns  
bey/vnd das Vater vnser/vnd/ Ich  
ruff zu dir Herr Jesu Christ. Vnd las  
es dabey wenden.

Solch ernstes vnd glaubiges gebet  
hat diese zusage/das es gewislich sol  
erhöret sein/vñ dem Menschen hülff/  
fe schaffen. Den so spricht David im  
91 psalm / Wer vnter dem schirm  
des höchsten sitzet / vnd vnter dem  
schatten des allmechtigen bleibt/der  
spreche nur frey/Gott ist meine burg  
auff den ich hoffe. Er wird dich mit  
seinen sittichen decken/vnd keine pla  
ge wird zu deiner hütten sich nahen.  
zc.

Wer aber an stat des hertzlichen  
Gebets Creutzwerck vnd andere zan  
teley schreibet vnd treibet/der mag  
sich wol fürsehen / das er nicht der  
mal eins/wenn er sichs am wenigste  
versihet / vmb solches seines ober  
glaubens vnd mistrawens willen/

mit einem Scharffentiner oder Fal-  
ckenetlin zu bodem geschossen wer-  
de / vnd vnter dem Wetter Gottes  
seinen Geist auffgebe. Denn Gott kan  
durchaus solch Papistisch vnd vn-  
christlich wesen an seinem Volck  
nicht leiden / Man beschöne es auch  
mit vernünfftigen vrsachen vñ exem-  
peln / wie man jmer wolle. Denn was  
nicht recht ist / das kan nicht recht  
werden / wenn jm gleich die ganze  
Welt zusiele.

### Frage.

Wie kömpts denn aber / das zuweilen Mens-  
chen / vom Wetter Gottes / zu tode  
geschlagen werden ?


Antwort. Ist der Mensch / dem dis  
widerferet / Gottlos gewesen / so ist  
es seiner sünden schuld / vñ geschicht  
dem andern Gottlosen vnd rohen *hauffen*  
zur warnung vnd zum schreckē / das  
er sich bekere.

Ist er aber ein fromer Christ ges-  
wesen / sein lebēlang / so sol man nicht  
anders von jm gedenccken vñ reden /  
denn das seine liebe zeit gekommen / vñ  
das

Das er dergestalt hat sterben sollen/  
vnd das er eben so selig sey/ als wenn  
er vffm bette / in der aller stillesten  
vnd süssesten ruhe entschlaffen were.  
Denn ein jeder Mensch hat seine be-  
stimmte zeit von Gott/ da mus nich-  
tes an feilen / vnd es ist auch einem  
jeden von Gott zugezeichnet / wes  
todes er sterben sol/ vnd da er gleich  
auff's schrecklichst vnd erbarmlichst  
würde dahin fallen/ so sol man/ wo  
fern er ein Christ gewesen/ an seiner  
seligkeit nicht zweifeln. Denn S. Pau-  
lus sagt / Roman. 8. Wir sind wol  
Schlachtschafe / für andern Men-  
schen / allem jammer vnterworff-  
ten / das sich auch viel an vnser  
gestalt ergern / Aber damit sind wir  
noch nicht gescheiden von der liebe  
Gottes. Nichts / nichts / nichts/  
spricht er/ Kan vns scheiden von der  
ewigen vnd bestendigen liebe Got-  
tes/ noch das hohe noch tieffe/ noch  
das lange noch breite/ wie auch vns-  
ser Creutz seinen namen haben mag.  
Wie starb doch das frome vnd vns-  
schül



schuldige Lemblin Gottes / Jesus  
Christus? Kan es auch eine zunge  
ausreden / oder ein Maler abmalen?  
Vnd blieb doch gleichwol Gottes  
liebes Kind / viel lieber als die / so im  
creuzigten / vnd seinen jammer von  
fern ansahen. Elias / der thewre Pro-  
phet Gottes / ward warlich nicht  
auffm roten polster / auch nicht in  
Lilien vnd Rosen / sondern in einem  
schrecklichen wetter / vnd fewigen  
wagen / mit fewrigē Kossen / zu haus  
geholt / vñ schadet im solchs nichts  
oberal an seiner Selen heil vnd selig-  
keit. Ja was für der Welt so stirbet /  
das stirbet offte am seligsten. Wie dem  
Gott die seinen wunderlich füret /  
vñ mit denselbigen rauch feret / wel-  
che er aus sonderlicher liebe hoch he-  
ben / vñ an jenem tage zu grossen eh-  
ren vnd zu grosser verwunderung  
machen wil. Ihm sey lob  
vnd danck dafür  
ewiglich.




AB 46 13  
AB 46 / n, 12

ULB Halle 3  
002 683 717



St







**D**anck sagung  
Für das bitter leiden  
vnd sterben Jesu  
Christi.

Mit angehengtem bericht von  
dem Abendmal des Herrn.

Vnd wes sich ein Christen vn-  
ter schrecklichem Wetter vnd  
harten Donnerschlegeln  
trösten sol.

Gestellet durch

*M. Stephanum Prætorium.*



Anno salutis 1582.  
25 Martij.

